


**Trwès mwès foués èt on s' rênonde...**




Kinze djoûs passés à dwârmu, tronner lès fîves èt ratchî tripes èt boyas. Nén moyén d' è fé ène fayêye broke. Pigote à migote on s' avéve risayî à ralignî dès tûzâdjès, *ritèchî* dès mos èt lès rimète bèn èxhène. K'c' èstéve deur ! Nos faut-i dire k'on a stî à deûs dwèts d' tot lèyî tchère èt s' djoker di continuwer à "*fé dins l' walon*" ? Bén oyi-da, ça nos avancéve à kwè ? A bèn mwinse ki wêre, èndon... D' ostant k' lès rècoradjemints, k' on a èspèré on lon timps, ç' a z-a stî po *Ratinco*. Nèlu po dire k'i s' avéve acostumé à prinde do plèji à lire nos pititès bièstrîyes, à riwêti nos imaudjes, èt k'ça lî mankéve. Faut-i riconèxhe k'ça nos a grètouyî èt fé mau èwousse ki ça n' passe èt nèn ? Bén oyi-da. Mins, come l' a si bèn à peu près dit l' *Rudîyeu Kiplonke* : "*Si t'és capâbe di l' r'muchî è t' scanson èt risèrer t' cinke, t' as pris d' l' âdje, in, mi fi...*" Adon, on a fini pa s' rimète à l' ovâdje èt taper nos siminces sins wêti à sawè si èles tchèyenuit dins

dèl boune tère odobén dès sètchès pîres...

\*

**Li vl'a k' a passé pa li pti trau.** L' Pinepoltchè n' va rén payî po ck' il a dsus sès cwanes. Lès djûjes di s' payi ont trové k' il èstéve bèn tro djondu po co passé au tribunâl. A s' n' âdje on



l' va lèyî viker à s' n' auje sins minme lî fé pwârter ène camuzole. I nd'a ène bèle pognîye ki n' vont minme nèn s' ritoûner dins leu vacha : i n' è n' ont pont ! Après tot, lès parints zèls ont co leûs ouy èt braîre.

\*

**On crossèfiye l' Mèssier...** L' grand mèsse èst dite, l' *G2M-dins-mi-stauve* s' voléve Grand Maîsse Mwinneû èt ramoncèler tot èt rén dsos sès aîles. Mougû tot k' il aléve fé. Bén, oyi-da ! C' n' èst nèn l' tot d' cauzer di statèdjîye, c' è-st è nn' awè iène ki tègne d' astampé k' i faut. Bén shûr, si l' CA s' continte di dire *amen* èt s' lèyî *pauwènemint* mwinrner d' truviè. Asteure, i va falu vinde pa bokèts l' Grande Vikandî soce. L' èst vraîy ki c' n' èst nèn l' prumère ni l' dêrinne; minme ki ça m' fait risondjî à iène

mwinrnêye pa on Antipâpe k'ètou aléve tot sikèter. Bof !

\*

**Pinsêyes**

"Divizer c' n' est rin, savez. C' est multipliye et mete exhone ki vos faut sawè fé !"

"Vos pinsîz awè on "produit fini" ? I l' trovenut si bin "fini" k' zèls volenut l' mète au batch !"

(Kon-fu-soyeû, dins "*Choutèz - m' l' moxhe zûner dins l' galant*")

\*

Dins l' timps, on vos apurdéve à nèn téléfoner à mauvau auzès djins. I n' vos faléve nèn lès disrindjî à n' importe ké momint. Asteûre, avou l' pwartâbe, vos l' ploze fé kand ça vos prind èt ièsse tot bièsse di vos ritrover à cauzer à ène bèrdèleuse bwèsse. Èt dire ki deus Inglès sont tot contints d' ièsse arivés à sititchî on tèlefone dins on dint ! Vos è rindèz-vos conte ? Vos sèrîz è plin *èmantchâle* avou vosse comère èt ètinde vosse binâmêye feume vos doner l' lisse dès comissions à ramwinrner... Ène afère à vos oblidjî à ridobler l' dâze di Viacrâ ènn'don.

\*

**I parètréve** k' on arive co à disfinde li walon ! A kî don ? Nèn à mi, todi, ki scrît l' walon come i n' l' a nèn studyî èt ki l' cåze come ça lî xhone, ki s' prind lès pîds dins l' powèziye, ki tchante come on saya, ki l' mitan d' sès tayons èstîne flaminds, k' inme bèn lès vîs cayèts èt cki n' rixhone à rén

\*\*\*\*\*